

藝文志

文者言也志者誌也德行道義非文不傳事業勲猷非誌不久傳曰言身之文也又曰言之無文其行不遠文之爲用彰彰矣夫文爲古今之命脈人世之精華雨露風雷爲慘爲舒至理存焉然無文以發明之則至理不顯山川草木繪聲繪象光輝厲焉然無文以歌咏之則光輝頓減又况人生在世轉瞬不存而或貴若寶珠壽如金石歷萬古而不泯者富貴不能爭權勢不能奪惟藝文之力可以致之藝文顧可少

朝城續志

卷之二

一

乎哉今特輯前人之碑銘後世之傳紀置之簡端以備徵攷

明倫堂東偏碑記

康熙四十一年

御製訓飭士子文

國家建立學校原以興行教化作育人材典至渥也朕臨御以來隆重師儒加意庠序近復慎簡學使釐剔弊端務期風教修明賢材蔚起庶幾棧樸作人之意乃比來士習末端儒教罕著雖因內外臣工奉行未能盡善亦由爾諸生積錮已久猝難改易之故也

茲特親製訓言再加警飭爾諸生其敬聽之從來學者先立品行次及文學學術事功原委有敘爾諸生幼聞庭訓長列宮牆朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考義毋雜荒誕之談取友親師悉化驕盈之氣文章歸於醇雅毋事浮華軌度式於規繩最防蕩軼子衿佻健自昔所譏苟行止有虧雖讀書何益若夫宅心弗淑行已多愆或蜚語流言脅制官長或隱糧包訟出入公門或唆撥姦猾欺孤凌弱或招呼朋類結社

要盟乃如之人名教不容鄉黨弗齒倖逃褫朴濫竊章縫返之於衷能無愧乎况乎鄉會科名乃掄才大典關係尤鉅士子果有真才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌沸騰罔利營私種種弊情深可痛恨且夫士子出身之始尤貴以正若茲厥初拜獻便已作姦犯科則異時蕩檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反覆惓惓茲訓言頒到爾

等務共體朕心恪遵明訓一切痛加改省爭自琢磨
積行勤學以圖上進國家三年登造束帛弓旌不特
爾身有榮卽爾祖父亦增光寵矣逢時得志寧俟他
求哉若仍視爲具文玩愒弗儆毀方躍冶暴棄自甘
則是爾等冥頑無知終不能率教也旣負栽培復干
咎戾王章具在朕亦不能爲爾等寬矣自茲以往內
而國學外而直省鄉校凡學臣師長皆有司鐸之責
者並宜傳集諸生多方董勸以副朕懷否則職業弗
修咎亦難逭勿謂朕言之不預也爾多士尙敬聽之

哉

明倫堂右偏碑記

御製訓士文

諭爲士者乃四民之首一方之望凡屬編氓皆尊之
奉之以爲讀聖賢之書列膠庠之選其所言所行俱
可以爲鄉人法則也故必敦品勵學謹言慎行不愧
端人正士然後以聖賢詩書之道開示愚民則民必
聽從其言服習其教相率而爲謹厚或小民偶有不
善之事卽懷愧恥之心相戒勿令某人知之如古人

之往事則民風何患不淳世道何患不復古歟朕觀今日之士雖不乏閉戶勤修讀書立品之輩而蕩檢踰閑不顧名節者亦復不少或出入官署包攬詞訟或武斷鄉曲欺壓平民或違抗錢糧藐視國法或代民納課私潤身家種種卑污下賤之事難以悉數彼爲民者見士子誦讀聖賢之書而行止尙且如此則必簿待讀書之人而並且輕視聖賢之書矣士習不端民風何由而正其所關係極爲重大朕自卽位以來加恩學校培養人材所以教育士子者無所不至

宜乎天下之士皆鼓舞奮興爭自琢磨盡去其佻儻之習矣而內閣諸臣條奏中臚列諸生之劣跡請行嚴懲者甚多朕思轉移化導之法當先端其本原教官者多士之儀型也學臣者教官之表率也教官多屬中材又或年齒衰邁貪位竊祿與士子爲朋儔視考課爲故事而學臣又但以衡文爲事任教官之因循怠惰苟且塞責漫不加察所以倡率之本不立無怪乎士習之不端而風俗之未淳也朕孜孜圖治欲四海之大萬民之衆皆嚮風而慕義革薄而從忠故

特簡督學之臣慎重教官之職欲使由上而下端本
澄清以收實效也凡爲學臣者務須持正秉公宣揚
風化於教官之稱職者卽加薦拔溺職者卽行叅革
爲教官者訓誨士子悉秉誠心如父兄之督課子弟
至於分別優劣則至公至當不涉偏私各盡其道則
士子人人崇尚品詣砥礪廉隅且不但自淑其身而
羣黎百姓日聞善言日覩善行以生其感發之念風
俗之丕變庶幾其可望也特諭

雍正七年六月立

朝城續志

卷之二

五

明倫堂左偏碑記

御製平定準噶爾告成太學碑文

乾隆二十年

遼矣山戎熏鬻旃裘毳幕之人界以龍沙畜其驛奚
雖無恒業厥有分部盖自元黃剖判萬物芸生東夷
西夷各依其地謬舉淳維未爲理據皇古莫紀其見
之書史者自周宣太原之伐秦政亘古之築莫不畏
其侵軼猾夏是虞自是厥後一二奮發之君慨然思
挫其鋒而納之宥然事不中機材不副用加以地遠
無定處故嘗勞衆費財十損一得搢紳之儒守和親

爪胄之士言征伐征伐則民力竭和親則國威喪於是有守在四夷羈縻不絕地不可耕民不可臣之言興矣然此以論漢唐宋明之中夏而非謂我

皇清之中夏也皇清荷

天之寵興東海撫華區有元之裔久屬版章歲朝貢從征狩執役惟謹準噶爾厄魯特者本有元之臣僕叛出據西海終明世爲邊患至噶爾丹而稍彊吞噬鄰蕃闌入北塞我

皇祖三臨朔漠大破其師元惡伏冥誅脅從遠遁跡

朝城續志

卷之二

六

母俾遺種於我喀爾喀厥姪榮妄阿拉布坦收其遺孽僅保伊犁故嘗索俘取地無敢不供逮夫部落滋聚乃以計襲哈密入西藏準夷之勢復張

兩朝命將問罪雖屢獲捷而庚戌之役逆子噶爾丹策楞能用其父舊人乘我師怠掠畜於巴里坤擣營於和卜多於是而準夷之勢大張然地旣險遠主客異焉此勞往而無利彼亦如之故額爾德尼招之敗彼亦以彼貪利而深入也

皇考謂我武旣揚不可以旣允其請和以息我喙予

小子敬奉

先志無越思焉旣而噶爾丹策楞死子策妄多爾濟那木札爾暴殘喇嘛達爾濟篡奪達瓦齊又篡奪喇嘛達爾濟而酗酒虐下尤甚焉癸酉冬都爾伯特台吉策楞等率數萬人來歸越明年秋輝特台吉阿睦爾撒納和碩特台吉班珠爾又率數萬人來歸朕謂來者不可以不撫而撫之莫若因其地其俗而善循之且母令滋方來之患於我額爾額也於是議進兩路之師問彼罪魁安我新附凡運餉籌馱長行利戰

朝城續志

卷之二

七

之事悉備議之始熟經於庚戌之艱者咸懼蹈轍惟大學士忠勇公傅恒見與朕同而新附諸台吉則求之甚力朕謂犁庭掃穴卽不敢必然喀爾喀之地必不可以久居若而人吾寧用其鋒而觀厥成卽不如志亦非所悔也故凡禡旗命將之典概未舉行亦云偏師嘗試爲之耳塞上用兵必以秋而阿睦爾撒納瑪木特請以春月欲乘彼馬未肥則不能遜朕謂其言良當遂從之北路以二月丙辰西路以二月己巳各啟其行哈密幹海內無雨今春乃大雨咸以爲時

雨之師入賊境凡所過之阿拓克携羊酒糗糒迎恐後五月己亥至伊犁亦如之達瓦齊於格山麓結營以待兵近萬我兩將軍議以兵取則傷彼必衆彼衆皆我衆多傷非所以體上慈也丁亥遣阿玉錫等二十五人夜斫營覘賊向賊兵大潰相蹂躪死者不可勝數來降者七千餘我二十五人無一人受傷者達瓦齊以百餘騎竄六月庚戌徇人阿騎穆霍集斯伯克執達瓦齊來獻軍門準噶爾平是役也定議不過二人行事不過一年兵行不過五月無亡矢遺鏃之

費大勲以集遐壤以定豈人力哉天也然天垂佑而授之事机設不奉行之以致坐失者多矣可與樂成不可與謀始以爲蚩蚩之衆云爾豈其卿大夫之謂既克集事則又曰苟知其易將勸爲之夫明於事後者必將昧於幾先朕用是寒心且準噶爾一小部落耳一二有能爲之長而其樹也固焉一二暴失德之長而其亡也忽焉朕用是知懼武成而勒碑文廟例也禮臣以爲請故據實事書之其辭曰茫茫伊犁大幹之西匪今伊昔化外羈縻條文之東大宛以南隨

畜獵獸蟻聚狼貪乃世其惡乃恃其遠或激我攻而
乘我緩其計在斯其長可窮止戈靖邊化日薰風不
侵不拒不來其那款關求市亦不禁訶始慕希珍終
居竒貨吏喜無事遷就斯悞漸不可長我豈憇其豈
如宋明和市之爲旣知其然飭我邊吏弗縱弗嚴示
之節制不仁之子再世斯斬篡奪相仍飄忽荏苒夙
沙革面前鞏披忱集泮飛鴉食黠懷音錫之爵位榮
以華裾腰前面請願効前驅兵分兩路雪甲霜鋒先
導中堅如鼉錯攻益以後勁蒙古舊屬八旗子弟其

朝城續志

卷之二

九

心允篤二月卜吉牙旗飄颻我騎斯騰無待折膠泉
湧於磧無茁於路我衆懽躍謂有天助匪啻我衆新
附亦云黃髮未睹水苴富春烏魯木齊波羅搭拉台
吉載衆紛紛款納牽其肥羊及馬潼酒獻其都耆合
掌雙手予有前諭所禁侵凌以茶交易大愉衆情衆
情旣愉來者曰繼蠹達瓦齊擁兵自圍依山據菹惟
旦夕延有近萬人其心十千勇不目逃掄二十五日
阿玉錫率往賊所銜枚夜襲直入其郭揮矛拍馬大
聲疾呼彼人旣離我志斯合突將無前縱橫鞞鞞案

角鹿捶龍種東龍自相狼藉孰敢撓鋒狐鼠逃將
往異域狃部遮之充渠斯得露布既至告

廟受俘凡此蕝功荷天之衢在古周宣二年乙亥准
夷是平常武詩載越我

皇祖征噶爾丹命將禡祺亦乙亥年既符歲德允協
師貞兵不血刃漠無王庭昔時準夷弗恭弗諛今隨
師行爲師候尉昔時準夷日戰夜征今也偃卧知樂
人生曰匪準夷曰我臣僕自今伊始安爾游牧爾牧
爾畊爾長孫子曰無向匪豈有今是

朝城續志

卷之二

十

兩朝志竟億載基成側席不違保泰持盈

重修明倫堂碑文

道光二十五年

邵逢吉邑庠

聖廟之建明倫堂之立上以之敷文教下以之培文
運是乃國家之鉅典都邑之重地宜使棟宇常新者
也余讀廟碑所載自有明以來以迄我國初修補維
勤廟貌輝煌堂容壯麗宜乎其時人文叢聚三科九
俊名卿疊出而爲文教行文運昌之所特隆歟道光
十年縣主楊公學師鄧老夫子倡修文武二廟甫謀
補修明倫堂修建忠義節孝二祠地暴大震明倫堂

倒塌木料磚瓦悉毀以致工程浩大難以猝辦鄧老
夫子仰天嘆曰此天助我成功也事非徐圖不可矣
未幾于道光十二年倡修忠義祠之後遂以老歸又
未幾楊公以憂去而此謀竟沮余有志奈德薄不能
倡此盛舉及我曲老夫子到任慨然以修建爲己責
遂于倡建節孝祠之餘與縣主屠公共謀修補兩廡
重建明倫堂謀甫就而屠公竟以憂去歲在癸卯安
陸府鐘祥縣我張公來署茲土初謁聖廟見兩廡之
坍塌明倫堂之全廢喟然嘆曰廟坍堂廢吾吏之恥

也其急修建勿怠于是同曲王二老夫子約同城集
紳士量力輸資共勦盛事兩月之間廟貌復新堂容
復整將見自茲以往教化風行人文蔚起可以追踪
國初之盛者何莫非我張公我曲老夫子盛德之所
遺哉余是爲序以誌不朽

蒼溪縣知縣楊統正祖父母誥命

制曰寵渥朝章錫類不遺於一命祥開家慶馳恩爰
及夫重闈爾楊克昌乃中書科中書舍人楊統正之
祖父弓裘衍澤瓜瓞綿麻作述相承再世式彰其祖

武淵源有自一經早裕夫孫謀茲以覃恩貤贈爾爲
徵仕郎中書科中書舍人錫之勅命於戲舊德弘昭
用廣顯楊之志新綸特賁永增泉壤之光

制曰禮由義起宏孝治於中閨命自天申貴榮施於
大母爾中書科中書舍人楊統正之祖母郭氏德懋
蘭儀光生槐蔭珩璜作則武垂淑慎之型苻藻流芬
丕振光昌之緒茲以覃恩貤贈爾爲孺人於呼鸞書
煥采合彤史以揚休象服增輝荷雲章而永慶
蒼溪縣知縣楊統正父母誥命

朝城續志

卷之二

十一

制曰宣猷服采中朝抒報最之忱錫類推恩休命示
酬庸之典爾楊恒乃中書科中書舍人楊統正之父
令德踐脩義方夙著詩書啟後用彰式穀之風弓冶
傳家克作教忠之則茲以覃恩贈爾爲徵仕郎中書
科中書舍人錫之勅命於戲篤生杞梓之材功歸庭
訓丕煥絲綸之色澤及泉臺

制曰壺教凝祥懋嘉猷於朝宁國常布惠揚休命於
庭闈爾中書舍人楊統正之母王氏勤慎宜家賢明
訓後相夫以順含內美於珩璜鞠子有成樹良材於

楨幹茲以覃恩贈爾爲孺人於戲昭茲令善之聲榮
施勿替食爾劬勞之報遺範常垂

蒼溪縣知縣楊統正併妻誥命

制曰官在禁林時揆天庭之藻班承綸閣還依冊府
之光爾內府中書科掌科中書舍人加一級紀錄五
次楊統正溫醇著譽恪謹持躬質有其文撰述分勞
於兩制才堪稱職絲綸賁寵於重霄茲以覃恩授爾
爲文林郎錫之敕命於戲西清超直用嘉翰扎之勞
北闕承恩尙勵靖共之節

朝城續志

卷之二

十三

制曰丕績奏於中朝端賴閑家之助寵章頒乎慶典
宜分齊體之榮爾內府中書科掌科中書舍人加一
級紀錄五次楊統正之妻王氏早習女儀克修婦職
鷄鳴交儆旣砥節于素絲蠶績執勞用邀恩于紫綉
茲以覃恩贈爾爲孺人於戲巾袿彰和順之風鸞書
誕賁廷陞煥褒嘉之命翟莠永貽

制曰臣心報國每資賢助于中閨婦爵從夫必普恩
施于繼室爾內府中書科掌科中書舍人加一級紀
錄五次楊統正之繼妻穆氏柔順嗣徽誰和叶吉旣

告虔于棗栗洵內教之克修堪比德于玗璜宜朝章
之式賁茲以覃恩封爾爲孺人於戲無忘象服之榮
勉副鸞書之錫祇承寵典益播休聲

遊擊郭紹泰祖父母誥命

制曰德厚流光溯源淵之自始功多延賞錫褒寵以
攸宜應沛殊施用揚前烈爾監生郭夢庚迺廣東清
遠營遊擊郭紹泰之祖父性資醇茂行誼恪純啟門
祚之繁昌華簪衍慶廓韜鈐之緒業奕葉揚休鉅典
式逢崇階宜陟茲以覃恩馳贈爾爲武翼都尉錫之
室之隆恩寵命其承令名克荷

朝城續志

卷之二

十四

誥命於戲三世聲華實人倫之盛事五章服采洵天
室之隆恩寵命其承令名克荷

制曰天朝行慶必推本於前徽家世貽謀遂承庥於

再世彝章宜錫寵命載揚爾

劉賈

氏迺廣東清遠營遊

擊郭紹泰之祖母壺範示型母儀著徽惠風肆好旣
比德於玗璜餘慶綿延自邀恩於翟茀特頒渥典用
表芳規茲以覃恩馳贈爾爲淑人於戲緩帶輕裘挺
孫枝之材武高文典冊貽大母之顯榮祇服寵綏長

昭良軌

光緒二十五年二月十七日

遊擊郭紹泰伯父母誥命

制曰誼篤靖共入官必資於敬功歸誨迪猶子而教之忠爰沛國恩用揚家訓爾監生郭乙元迺廣東清遠營遊擊郭紹泰之伯父躬脩士行代啟儒風抱璞自珍克毓珪璋之秀析薪能荷彌彰杞梓之良茲以覃恩賚封爾爲武翼都尉錫之誥命於戲昭令聞於經籙書貽刻鵠佩徽章於策府寵賁廻鸞茂典丕承榮名益劭

朝城續志

卷之二

十五

制曰家有孝慈之範美以相濟而成國崇褒錫之文恩以並推而厚爾劉氏迺廣東清遠營遊擊郭紹泰之伯母德可相夫教能啟後一堂環珮和音克著其慈祥五夜機絲內治聿昭其柔順茲以覃恩賚封爾爲淑人於戲溥一體之榮施鸞章賁采表同心於訓迪象服分光

光緒二十六年三月二十二日

遊擊郭紹泰父母誥命

制曰寵綏國爵式嘉闕閱之勞蔚起門風用表庭幃

之訓爾郭戊元迺補用遊擊廣西上林營都司郭紹泰之父義方啟後穀似光前積善在躬樹良型於弓治克家有子拓令緒於韜鈴茲以覃恩贈爾爲武翼都尉錫之誥命於戲錫策府之徽章洵承恩澤荷天家之庥命允賁泉壚

制曰怙恃同恩人子勤思於將母起桓著績王朝錫類以榮親爾

王陳

氏迺補用遊擊廣西上林營都司郭

紹泰之母七誠嫻明三遷勤篤令儀不忒早流珩瑀之聲慈教有成果見干城之器茲以覃恩贈爾爲淑

朝城續志

卷之二

十六

人於戲錫龍綸而煥采用笞劬勞被象服以承庥允光泉壤

光緒二十六年三月十二日

侍衛郭紹泰父母誥命

制曰奮揚威武固資宣力之臣敷錫寵光用表推恩之典爾武生郭戊元迺藍翎侍衛加四級郭紹泰之父躬修克愆庭訓時勤門祚開祥早授豹韜之業天家有慶聿頒鸞采之書茲以覃恩封爾爲昭武都尉錫之誥命於戲義方懋著其教思果堪負荷休用酬

其貽穀被服寵膺

制曰戎事宣勞每興懷於將母王廷沛澤爰錫類以

榮親爾

陳王

氏迺藍翎侍衛加四級郭紹泰之母克修

壺則聿著母儀教子矢忠盡之忱兜鍪煥采酬庸本

庭闈之訓綸綍生光茲以覃恩封爾爲恭人於戲際

燕喜之昌期甯忘國命受鸞翔之典冊用表家楨

光緒十五年三月十六日

遊擊郭紹泰叔父母誥命

制曰誼篤靖共入官必資於敬功歸誨迪猶子亦教

朝城續志

卷之二

十七

以忠爰沛國恩用揚家訓爾武舉郭癸元迺廣東清

遠營遊擊郭紹泰之胞叔父躬脩士行代啟儒風抱

璞自珍克發圭璋之秀儲材足用聿彰杞梓之良茲

以覃恩貤封爾爲武翼都尉錫之誥命於戲昭令聞

於經籙書貽刻鵠佩徽章於策府寵賁迴鸞茂典丕

承榮名益劭

制曰家有孝慈之範美以相濟而成國崇褒錫之文

恩以並推而厚爾馮氏迺廣東清遠營遊擊郭紹泰

之叔母德可相夫教能啟後一堂環珮和音克著其

慈祥五夜機絲內治聿昭其柔順茲以覃恩賍封爾
爲淑人於戲普一體之榮施鸞章賁采表同心於訓
迪象服分光

光緒二十六年三月二十二日

侍衛郭紹泰兄嫂誥命

制曰委質策名榮旣膺夫簪紱克家纘緒光必逮夫
門閭爾文生郭紹宗迺藍翎侍衛加四級郭紹泰之
胞兄道足持躬情殷訓弟經傳詩禮青緇揚雁序之
輝慶篤芝蘭丹綉煥龍章之麗芳徽允懋新典宜頒

朝城續志

卷之二

十八

茲以覃恩賍封爾爲昭武都尉錫之誥命於戲被章
服以增榮聿顯友恭之義承絲綸而無忝彌彰善慶
之風

制曰教佐義方內則允彰夫懿範榮敷閨闈朝恩宜
體乎私情爾閩氏迺藍翎侍衛加四級郭紹泰之嫂
貞淑性成徽柔道協身嫻姆訓聿儲卓犖之材志稟
慈徽用衍熾昌之緒丕昭淑慎特賁絲綸茲以覃恩
賍封爾爲恭人於戲龍章式煥令儀著美於當時象
服欽承名德益彰於奕葉

光緒二十年八月十六日

侍衛郭紹泰兄嫂誥命

制曰委質策名榮旣膺夫簪紱克家纘緒光必逮乎
門閭爾郭紹汾迺藍翎侍衛加四級郭紹泰之兄道
足持躬情殷訓弟經傳詩禮青緗揚雁序之輝慶篤
芝蘭丹綉煥龍章之麗芳徽允懋新典宜頒茲以覃
恩貽封爾爲昭武都尉錫之誥命於戲被章服以增
榮聿顯友恭之義承絲綸而無忝彌彰善慶之風

制曰教佐義方內則允彰夫懿範榮敷閨闈朝恩宜
體乎私情爾李氏迺藍翎侍衛加四級郭紹泰之嫂
貞淑性成徽柔道協身嫻姆訓聿儲卓犖之材志稟
慈徽用衍熾昌之緒丕昭淑慎特賁絲綸茲以覃恩
貽封爾爲恭人於戲龍章式煥令儀著美於當時象
服欽承名德益彰於奕葉

光緒十五年三月十六日

同知謝祐併妻誥命

制曰分猷佐治端資貳守之良課吏安民並紀協恭
之績爾四川保寧府同知謝祐提躬恪慎蒞事精勤

分雙旌五馬之榮襄六典九條之治詰奸宄而克靖
礪廉隅以自持慶典欣逢褒章宜煥茲以覃恩特階
奉政大夫錫之誥命於戲撫循是職贊良牧以宣猷
綸綽式頒沐新恩而勵節

制曰良臣宣力於外効厥勤勞賢媛襄職於中膺茲
寵錫爾四川保寧府同知謝祐之妻趙氏終温且惠
既靜而專綦縞從夫克贊素縑之節蘋蘩主饋爰流
彤管之輝茲以覃恩封爾爲宜人於戲敬爾有官著
肅雍而並美職思其內迪黽勉宜同心

朝城續志

卷之二

二十

乾隆十六年十一月二十五日

黃公德政碑

訓導余朝梅

史冊所稱去後思何穎川借寇千載下流風可挹休
哉何其得民也邑侯黃公其諸後先繼美者歟公以
光緒庚寅五月來攝縣事下車之始條舉廢墜會值
大水秋無禾民歎失所公陳書上大府乞緩漕并發
賑拯受災之甚者大府於是發賑數千金審稽戶口
徧給之蓋五六十年未舉之惠政乃今始見之曹屬
素藪盜盜數往來城壞不完或且闌入爲害乃謀更

新爲永永計擇有力者助緡錢召徒傭購土木方春
經始四閱月工畢牆堞之屬盡復舊觀又浚河渠備
霖潦母有障塞臨河兼設涵洞以利畜洩其勤民事
率類此顧尤好文學恤士厚每校試評隲允宜文藝
多所竄改公在官蕭然清貧急公事貲費無所惜其
他措置不概述云夫令以親民也其蒞官居職徒以
傳舍視之者無論其吏也良者殫心爲政惟自知之
民惡乎知之惡乎言之然誠使心至而政亦至民又
無不知之而且言之今公之來承乏未二年獨能施

用所學以致於政取朝之人而襦袴衽席之而朝之
人亦復知公之勤民懇到之意如此知則感感則誦
方諸古之循卓前後一揆洵乎爲慈父母矣其福吾
邑者豈有窮耶故摭事之大者敬書之而勒諸石公
名葆年字錫朋江南泰州人光緒癸未年進士
黃公葆年戒早婚以整風化碑文

夫婦爲人倫之始婚嫁寔風化之原妃匹之義所以
上承宗廟下繼後世者也禮男子三十曰壯有室又
曰男子三十而娶女子二十而嫁惟陽所以統陰又

陽舒陰促故男必長於女後世緣情制禮未嘗限爲定制然男子冠而昏女子笄而字其大較也嬉嬉童幼茫不知成人之禮烏足以刑妻而宜家本縣下車以來風聞朝城陋習兒女婚嫁往往年不相當揆厥由來大率夫家急需中饋乃虛增其子之齒以欺女氏女氏貪夫家之產業亦含糊以應媒氏甚至有九歲而結褵者有年甫十二已膠續者相沿成俗不知其非甚非所以廣嗣續而篤燕婉也夫夫倡婦隨本屬好合不問其年齒之相若與否而強爲媒定怨起

泮冰釁生禍水或新婦以抑鬱致疾或新郎以貪色成瘵或不敬所天而家庭生其勃谿或不安其室而帷簿播其醜行以致意外之事因此而生傷化黷倫釀成訟案本縣以維持風化爲已任但可從宜從俗斷不肯以變革之政強民間以所難似此婚嫁不時旣乖家道又滋訟端豈容聽其任意妄行不加整飭知其不可而爲之父母之過也知其不可而聽之士大夫之責也爲此示諭閭邑士民人等嗣後凡爲兒文擇配者總以男長於女爲正其女長於男一二歲

或二三歲尙屬可行義不得過四歲以上男子親迎之期總以二十歲爲限其家中需人或十七八歲十六七歲亦尙可行義不得在十五歲以下目下已經定婚者聽但不准違限迎娶本縣爲風俗起見不得不剴切曉諭自示之後里長莊長以及各邨讀書明理之人務將此意家傳戶誦勿狃於從前陋習致室家之不安貽鄰里之嘲笑夫婦正而家道正可以登仁壽之域而納福祿之林矣倘有仍蹈覆轍者一經查出定將兩家父母從重傳責媒人一併懲辦里長

朝城續志

卷之二

二十二

莊長匿不以聞治以奉行不力之罪該里長莊長等亦不得因嫌挾制至開攻訐之風倘能從此一洗從前之弊其有便於爾士民人等者不可枚舉慎勿視爲具文也切切特諭

光緒十八年四月中旬勒石

重修朝城城序

蓋聞民力不可以輕用而衆志乃足以成城予攝篆

於茲二年矣始至見城郭傾圯不敢輕議修築懼厲民也旣而雨水爲災民食無所恐遂致流離乃就而

告之曰爾其事爾農事養爾老幼_予將爲爾請諸大吏免爾租賑爾粟繼之浚河湟築城郭俾爾自食其力以待來年新穀之登爾毋散而四方也皆曰諾_予既與民約則深慮工費之不易集也進而商諸邑之同官者同官者以爲然謀諸紳士紳士以爲然遍告諸鄉里之長老長老皆以爲然乃延邑里之賢而更事者董其成而乞同官者爲之督勸焉去年冬河工成今年城工成麥秋方至秋收亦中稔民鮮流亡嗚呼勞民傷財古人所戒而_予乃興事勸功於荒歉之

朝城續志

卷之二

二十四

年苟非邑之諸君子知其力之不及而欣助之鄉之諸父老諒其心之無他而相與竭蹶趨之其能以有成耶雖幸而有成其有費於吾民之財力固已多矣故_予謹而書之以誌夫力役之不可以輕舉而作事不廣咨於衆之果不足以有成也且少有破壞及時修葺則不至再興大役以重勞吾民是不得不重有望於後來之君子也至捐用白金若干例得請廣學額若干是又在

國恩之高厚與夫

大吏之權衡也已

知朝城縣事泰州黃葆年撰文

進士孫纘碑文

黃門諫議大夫孫老年伯諱纘字煥哲別號桐蘿以名進士出身初任唐山縣令清慎明決惠政及人唐之士民立祠感頌以垂不朽撫軍嘉其廉卓異上聞欽取入京考授禮垣正直剛方不諧於時致仕旋里琴書自娛所與遊者皆正人君子年伯生於萬曆癸丑卒於康熙戊辰享年七十有六越十年暨元配孺人江太君合葬於城南孝里村祖塋之次其生平忠

朝城續志

卷之二

二十五

孝大節余姻戚臧君爲之誌銘詳且盡矣至其世系源流前代碑碣悉能載之余更無以加焉祇卜其潛德之光克昌厥後者而表著之年伯子男一諱士斌與余以年誼而結姻盟官國學博士女三俱適名族孫二長印來賀卽余宅相也治詩經舉癸酉房魁次來朝幼業儒曾孫四長名愚次魯次愨次恕皆余甥也俱穎異英發頭角不凡益信世德綿綿於無窮也旣表之復爲慶喜而歌之曰惟我年伯世德淵源溯彼先世列爵封藩及伯之躬大起黃門名勒鐘鼎有

子有孫子職博士孫科騰騫子子孫孫愈積愈蕃

癸卯科舉人現任山西潞安府長治縣知縣年小侄
趙昶永南頓首拜撰

康熙三十八年三月上浣

吳景素先生墓表

吳式基

先生諱玉書字景素姓吳氏朝城望族其上世多顯
宦明萬曆年間歷任廉憲祠鄉賢巽庵公諱中傳乃
鼻祖也逮清入承明統先輩多隱居不求仕進曾祖
諱法動祖諱顯陽皆耕讀傳家父秀峯公母張氏望

朝城續志

卷之二

二十六

子成名綦切兄弟三人惟景素夙穎異年十七遊於
庠越十一年食餼又十九年貢入太學再領房薦未
登賢書慨然嘆曰半生窮措大何日能顯揚言之淚
泫泫下盖自傷不遇而明發有懷也性篤學經史而
外兼覽百家羽翼先儒獎掖後進遊其門者多溫文
儒雅之士蜚聲庠序者數十人四方遠近咸奉爲泰
山北斗一世推爲人師幾與宋湖州先生相頡頏尤
勇於爲義歲庚寅僉議重修文廟時主事者爲學官
李月樓與縣令英崑有隙排擠誣構幾陷於危衆忿

甚莫敢誰何景素獨奮然挺身上書大府立剖其冤
至今父老猶嘖嘖稱道弗衰揆諸爭也君子之言若
合符契著有課生塾藝數卷論策精當津逮後學膾
炙一時間有吟詠懷古詩篇一種忠義之忱溢於言
表晚年自著年譜一卷實錄也喜遊覽山川擬北上
幽燕東登岱岳以壯其文瀾詩思而卒不果竟自老
於林下其命也歟先生生於清道光丙午年於民國
五年丙辰二月十五日卒於家享年七十有一既卒
之三十八日卜葬城北秦莊先塋之旁與元配李氏
合墓門弟子思慕其懿訓潛德而不能忘謀於式基
爲表其墓式基與先生同姓而支分派別嘗共事一
隅每呼之爲宗兄知其事甚悉不敢辭不文乃揭於
其墓之原以垂諸不朽云

冀楨秦先生碑文

訓導余朝梅

先生諱河松幼敏慧弱冠補諸生旋食餼屢式棘闈
不售以明經終老年喪明里居戒博賭止鬪訟教誨
及門勤於課藝成名者數十人生平有大志略以濟
世自許道光之末萑苻東擾先生與郝錫達郭金城

等連莊合捕逆氛用息咸豐十一年二月擒匪寇觀
城邑令董公塋命團練先生領忠心團以郝錫達爲
團長駐隊王坊時西團與擒匪戰團總孫安邦敗沒
於陣先生復糾合北鄉諸團悉力相拒三月教匪張
玉懷等陷城董公死之刼獄燔署延倫秀復自北來
恣剽掠去四月郝清連郭振師並稱元帥有張躋堂
者在縣充當募勇爲張玉懷所擄復縱之還至是亦
稱元帥會擒匪復來先生與郝錫達郭金城李書明
崔方東議再擴充團務並約秋三沙六二里合爲一

團以張聲勢推謝守樸爲團總立局邱樓選長丁數
十人馬數十匹備偵探楊士太等教陣法張清魁馬
冲霄筦火葯芻糧事各有緒繼而蘇光彩李夢白等
議各團練於是秋三沙六里等庄別立團長而五十
餘庄遂不受調遣先生恚憤急調賈庄吉祥寺韓張
店等庄回本團自樹一幟六月教匪宋景師等竄入
境沙六秋三兩里皆鳥獸散先生團獨無恙七月移
局常庄九月堂主丁書堂欲赴西北先生與趙玉龍
詣辛庄俄而獲賊五人將斬之郝錫達以其侄被擄

遣往說留三人爲質釋二人歸待其侄歸乃歸三人少頃侄返將釋三人公義團團總楊廷美執不可先生以師濟在和不肯與齟齬立斬三人以徇賊怒攻之急幾交鋒刃已而寂然乃馬學夢奄至逆賊已西颺也無何賊又聲言將攻兩團兩團出戰火器齊發賊奔而南時張躋堂潛與賊通不爲要截其團受禍者糾衆千人浼廷美同擊賊匪廷美與躋堂至范邑使人邀先生與俱先生曰歸賊莫追且躋堂不可與共使者歸報而兩團已潰敗矣先生度戰不可恃爲

堅壁清野之謀擇地於主簿營築圩自固躋堂愆愆邑令趣修城輟圩工嚴諭弗聽督工不怠躋堂復使人約團總謝守樸隨堂主吳錫桂爲立逆旗謝不從因引捻逆攻之先生及賈守樸夜至張魯謁勝宮保乞師宮保許給馬隊未卽發明日又與邱鳳樓提賊首二級往號泣哀懇勝乃遣游擊張遇祥率練勇四百九人來援軍至賊退十餘里圩得無恙踰日遇祥廷美爲雜旗所困遇祥身中四矢不退先生聞之率隊往救遇祥廷美皆脫難走適國將軍兵到雜旗散

走未幾國將軍聽躋堂之譖團總摘頂受辱先生與
廷美往愬曰張逆南通北勾實爲盜媒若弗除難終
未已宮保乃調之往命隨軍勦賊而邑令多方爲之
地竟不往旣而邵翼之張春藻愬於譚中丞檄文至
躋堂始他徙而去至寇氛稍靖四方事緩先生卽杜
門不出家居授經以治團敘得六品軍功候選訓導
卒八十三

昭忠祠碑記

嗚呼我從兄子文生丙午及武生閆克順耆老周廷

朝城續志

卷之二

三十

標等旣殉難之二年歲次乙丑翼之與同團張元和
等建

祠於古塔之北又四年至於今始克立碑於祠以序
其事夫我

國家深仁厚澤二百有餘年矣其間雖不無奸民如
王淪林青小小竊發旋卽捕滅而洪張等逆久稽天
誅蹂躪至十餘省海內迄無甯歲咸豐庚申

文宗顯皇帝宸懷內斷特命忠親王僧格林沁統師
進勦復簡重臣各於其省倡督民團防竄逸而靖地

方山東則侍郎杜公翻司其事時朝城縣令爲順天董公涵攝縣事纔三月耳性忠烈勤撫綏日集紳民以大義相淬厲檄到卽諭翼之董團事而丙午等亦皆相與矢志殺賊由是南北防勦殆無虛日次年春南匪由濮范渡河勢甚銳公命翼之等赴縣南杜禦而北匪張遇獲宋景詩輩乘間蠡起彼時縣城如平地董公悉力防守二十七晝夜於三月乙巳力竭身殉翼之等且愧且憤誓殲賊以報公仇而賊於僞降之後亦日謀甘心於我同治二年降匪張濟堂與張

遇獲等窺王師南下豫皖復嘯聚衆且萬餘時

邑令王公召翼之入城議防守賊突薄城下抵暮始解翼之歸圩人不滿千而賊踵至悉衆環攻閭克順等於西牆往來奮擊賊焚西北兩門突入丙午等率敢死士數十巷戰殺賊數百賊以折衄出圩者再卒以寡衆不敵同時遇害周廷標等亦罵賊不屈甘就屠戮以故圩雖破賊亦胆落而退時三月壬午事也翼之稟忠親王及撫憲該逆伏誅因赴京懇忠義總局又蒙撫憲闔上其事奉

旨賜恤祭葬世廕如例丙午克順等俱准入昭忠祠
翼之等於祠成後因念剪除寇氛保乂黎元者忠親
王之力也扞蔽城社臨難不辱者董公之德也遂設
忠親王神位於上而以董公配享丙午等以次皆附
祀焉嗚呼丙午等不過鄉曲之士非有官守之責而
皆能慷慨赴死與董公先後殉難其凜凜生氣固可
與忠親王同歆俎豆於千秋翼之身膺其事不得卽
從諸君於地下其愧恨當何如哉然而諸君之忠義
自不沒於兩間也銘曰

朝城續志

卷之二

三十一

寰海夷清	萬物熙熙	蠢爾小醜	乃肆梟鴟
孰爲養疽	致身潰爛	孰在戎行	致寇滋蔓
於赫僧王	震驚殊方	剪除寇氛	撻伐用張
烈哉董公	不有其躬	齒齧睢陽	血濺侍中
公拚一死	士氣皆墨	枕戈尋仇	求死不得
烈焰投燼	敢云報國	風慘城南	月暗塔北
豈不惜命	對公無色	碧燐夜哭	青史誰傳
招魂入祠	天恩宏宣	揮毫未終	五內寸裂
斯石可朽	其名不滅		

五品頂戴候選翰林院待詔增貢生邵翼之撰
候選訓導李曉瀛先生碑銘 邑人張董書

蓋聞維持風化在上則有君相在下則有師儒昔王仲淹設帳河汾名臣多出其門胡安定建齋湖洲太學取以爲式是皆隱居教授立功德於不朽繼之者其惟吾子李先生乎先生諱晨字曉瀛朝城人昆季凡四伯兄昂遊庠最早仲兄昇擢當家計供諸兄弟讀書資甚勤叔兄昌與先生茹苦力學同受知於青州李公鴻李公文章世家以名孝廉司鐸我邑愛其

朝城續志

卷之二

三十二

兄弟清苦日爲指畫遂得嫡傳後李公中進士授縣令去先生與其兄自相師友課藝互相質證而其文益工科歲試輒冠軍卒不得博一舉以明經終文章真憎命哉然四方學者仰爲山斗爭延爲師先生又善誘不倦門下士成名者不下數十百人皆能有所樹立余每見學者循循雅飭不問而知其爲先生弟子也著有晴嵐塾課制藝實足津逮後學尤長於詩帖摘集名作數百首詳註作法顏之曰詩法分類集錦大爲縣令傳公所嘉賞爲作序以弁其編其於諸

兄最相友愛每自館歸入門握手竟日言笑與外人
不甚欵曲而好與余談余讀書疎濶不肯爲時文拘
束每相過從上下數千年不免馳驟而先生非制藝
不言晚年益相得焉其子姪輩多人邑庠有文名克
紹厥志先生享年六十六歲卒於光緒七年四月二
十八日今卜葬於十月朔諸同人謀爲立碑而屬余
作銘余以先生之德足與仲淹安定先後映輝自可
不朽傳何待銘而故舊之思固余所不忘也銘曰武
水陽冠山旁明秀鍾靈先生鄉先生講學文中王先

朝城續志

卷之二

三十四

生說詩解頤匡不必得位俎豆馨香先生之風山高
水長

歲貢戴先生碑記

邑人吳式基

仲宣戴先生

諱

金聲天資英敏性情靜穆嘗從舉人

田清蓮先生遊謂其清超拔俗不染塵氛科第不難
立致無如時數限人文章憎命竟以明經老晚年教
授生徒手抄經傳數十卷悉加解釋其季子增生元
凡先生所釋經若傳及所著古文詞均珍爲手口澤
以傳於次子恩猶子惠皆掇芹食餼蜚聲鬻序世德

之縣延庸有既乎先生諸門人竊慕其門庭雍睦橋梓濟美洵足爲一邑光爰勒石以垂不朽是爲記
城守記

自前清咸豐四年二月髮匪李開方破陽穀土匪因之破朝城而縣尊任騰蛟殉難至十一年教匪張玉懷閭掄秀破莘縣冠縣而因以及我朝縣尊董涵殉難迨至民國以來土匪滋擾無日無之迄民國七上年憲因陸軍防營兵力不敷分布飭各縣成立警備隊兵餉皆派自民間而是年土匪益形橫肆縣長林

朝城續志

卷之二

三十五

仲幹擁兵自衛警備二百五十名警察五十名共三百名之多不敢出城緝捕以致正月十六日攻侯莊舖運糧海兩圩而不救正月十九焚燒雷莊圩而不救他如架人勒贖不可枚舉卽距城一里之趙莊架票搶劫絕不出救浸漬已久賊勢愈大逮七月二十五日寅刻夥賊悉衆攻城林縣長聞耗卽藏於西街饅饂房馬三家幸賴兵皆土著民氣奮勇槍斃夥賊多名賊始退去次早而林縣長送家屬逃去以爲民望幸而賊未反攻耳無如賊患熄而兵患熾矣凡賊

尖住之所無論強迫與否概行科罰賊所攀供之人無論冤屈與否概行拘禁噫賊禍暫而兵禍長吾朝民不知伊於胡底矣幸潘縣長接篆戒飭各隊長訓諭衆兵丁而兵始不爲民害矣所冀自今以往賊氛息而兵害除庶幾太平可復見也夫

捕盜

畧曰安民之術必先捕盜而捕盜之術莫便於舉盜夫舉盜者以民訟盜而官爲之主嚴刑以詰之重罪以懲之勦窩以絕之使爲盜者攻盜以贖罪學盜者

朝城續志

卷之二

三十六

遠盜以爲良官無緝捕之勞民受安樂之福有由然矣何則民之不安盜擾之也盜擾之而不設法以捕之則民之爲盜者多而民之被盜者無已時始而偷竊漸而掠奪漸而搶劫甚至聚夥結隊執兵器以威逼事主而性命爲之不保此盜之所以不可不捕也獨是今之捕盜者每多賄盜以緝盜否則諱盜以縱盜究之所用捕役練軍亦皆爲盜無事則乘夜竊出結鄉間之小醜以劫人貨財有事則執牒公行通在案之羣匪以速其避匿或則貪圖贓賄指盜爲良或

則乘機尋讐誣良爲盜致使爲盜者不諱言盜被盜者不敢言盜而閭里之騷動不捕之而民不安捕之而民愈不安此捕盜之弊尤甚於不捕也卽如前史所載龔遂虞詡張綱李崇之徒或置吏以察盜或製衣以識盜或設伏以詐盜非不可以靖萑苻清潢池也而究捕不勝捕者是徒以兵捕之以役捕之而不以民捕之也且夫以民捕之非必借民之財也非必用民之力也非必使民獲盜也非必使民殺盜也一鄉之民有鄉長焉則使舉一鄉之盜一里之民有里

長焉則使舉一里之盜一人爲盜四鄰共舉之四鄰爲盜一鄉共舉之而尤必官爲之主詰盜以嚴刑懲盜以重罪絕盜以勦窩民舉之卽捕之勿使遲延而生禍勿使逃遁而藏形盜無所匿自捕無不獲官不勞而民自安矣然尤恐其相緣爲姦也則必出示以諭之曰非盜而誣舉爲盜者罪爲盜而謬謂非盜者罪受盜之財賄而爲盜申請者罪畏盜之挾制而爲盜護惡者罪夫而後民不附盜盜不擾民間閭無綠林之患往來無暴客之慮夜不閉戶道不拾遺士農

工商各安其業是皆由捕盜之有其術也豈可專恃
乎兵與役哉

吳蘊生先生傳

吳瑛山道光己酉科拔貢不樂仕進與兄耀山家居
篤於孝友值咸豐甲寅辛酉之變總辦團務城鄉賴
以獲安者十數年我朝書院久廢經先生捐錢五百
千房宅一區稟命屠縣尊道彰創立育英書院迨同
治初年苦無經費稟命權縣尊汝欽入叛產八百餘
畝以爲修金膏火資迄今學堂猶資遺澤焉至學問

朝城續志

卷之二

三十八

之淹博詩文之淵雅猶其緒餘耳

謝孝子傳

謝得所

謝君世孝宦裔也喜詩書性孝友親歿致哀廬墓三
年值世亂輟讀習弓馬應郡試矢近革數步而墮忽
又騰躍中鵠學使駭問廣文以孝對因首拔之其弟
世彥世昌與猶子崑田均以武庠顯後因歲饑食指
繁恒產不足供饘粥弟以分炊就商生愀然曰吾家
雖不饒固武陽望族母以田產細故輒生詬誅以貽
前人羞將祖父遺業析而三之令弟自擇夏屋數楹

悉歸季弟惟經史諸書特加珍重縱釜甑塵飛不忍
鬻一卷暇則博覽之尤精痘疹活嬰孩無算故生卒
五十餘年人猶豔稱之吾鄉先達孝行卓著者首推
邵璋友于克敦者紫荆昆仲生能兼之洵堪並垂不
朽云

俠婦傳

賈銘恩

天地塊壘之氣鍾之於男則爲奇男子英雄豪傑立
名千載古有之矣女子生長深閨氣秉陰柔未聞以
淑嫻之質亦能效雄傑之所爲而立名千古者我朝

朝城續志

卷之二

三十九

民婦楊氏拳勇楊法良之女弟也年十八室郝某合
番之夕坐守花燭夫幼先寢約至夜半聞剝啄聲婦
起伏暗處俄見二賊閃入直走內間衣物搜括一空
婦屏息伺變俟賊出尋得鐵尺一柄尾追門外突仆
一賊餘賊遁去翁姑起視一無所失惟見血跡淋漓
婦之材勇真有過於男子者故爲之傳以志之

補遺

廣西思恩軍民府西林縣知縣孫來賀父母誥命

制曰求治在親民之吏端重循良教忠勵資敬之忱

聿隆褒獎爾孫士斌乃廣西思恩軍民府西林縣

知縣孫來賀之父禋躬淳厚垂訓端嚴業可開先

式穀乃宣猷之本澤堪啟後貽謀裕作牧之方茲

以覃恩贈爾為文林郎廣西思恩軍民府西林縣

知縣錫之勅命於戲克承清白之恩軍民府西林縣

慰顯揚之志昭乃遺謨

昭乃遺謨

制曰朝廷重民社之司功推循吏臣子凜冰淵之操

教本慈幃爾廣西思恩軍民府西林縣知縣孫來

賀之母李氏淑慎其儀柔嘉維則宣訓於朝夕

不忘育子之勤集慶澤於門閭式被自天之寵茲

以覃恩贈爾為孺人於戲仰酬顧復之恩

恩勉思撫字載煥絲綸之色永賁幽潛

朝城續志

卷之二 誥封

又三十九

康熙六十一年十一月二十日

廣西思恩軍民府西林縣知縣孫來賀暨妻誥命

制曰分符百里必遴出宰之材報最三年爰重懋官

之典爾廣西思恩軍民府西林縣知縣孫來賀雅

擅才能克宣慈惠撫綏有要常深疾痛在己之心

懷保無窮不忘顧復斯民之責茲以覃恩授爾為

文林郎錫之勅命於戲前勞已茂用褒

製錦之能來軫方適益勵飲冰之操

制曰良臣宣力於外効厥勤勞賢媛襄職於中膺茲

寵錫爾廣西思恩軍民府西林縣知縣孫來賀妻

趙氏終溫且惠既靜而專綦縞從夫克贊素絲之

節蘋蘩主饋爰流彤管之輝茲以覃恩贈而為孺

人於戲敬爾有官著肅雍而並

美職思其內昭淑慎之遺徽

康熙六十一年十一月二十日

匪患

土匪爲患何代蔑有或禍及官而未及民或禍及民而未及官若官與民並受其禍此則大亂之世也我朝自清初以迄今日幾三百年其間之亂不一城被圍而陷者四被圍而不陷者二爰列簡端以備觀覽
順治四年冬十一月土寇黃鎮山破城十二月又破城邑侯阮鞠廷請兵討之寇遁

五年大亂郭外悉賊壘農桑俱廢村落焚毀殆盡

七年三省部院張統兵合勦遁范縣榆園

朝城續志

卷之二

匪患

四十

八年春用舟師始平之賊渠黃鎮山石峩然張粹等悉受首

咸豐四年春正月金陵大逆洪秀全遣李開方等北犯僧忠親王率兵困賊於阜城

正月洪逆遣黃生才曾立昌等率髮匪數萬北援欲解阜城之圍二月初二日髮匪黃生才等自張秋鎮入陽穀城陷縣宰文瑩罵賊殉難賊趨莘縣又自莘縣趨冠縣遂犯本境張魯集一帶殺戮虜掠北竄臨清遇都統勝保擊敗之賊又南奔犯王奉大場民人

被其蹂躪迨至初七日土匪糾黨數百冒充粵匪陷城知縣任騰蛟死之賊縱獄囚焚公廨劫掠一空遲至月餘兵官黃良楷來縣拿獲首從諸賊梟首示衆咸豐十一年二月間莘冠等縣教匪倡亂旗分五色黃旗張玉懷白旗程順書黑旗宋景詩綠旗楊明嶺紅旗閻掄秀隣封皆失守我朝縣尊董涵捐廉三千修葺城垣破壞至三月十七日張玉懷等率賊攻我城城破殺知縣董涵城中被殺者百餘人此時以北街當店爲縣署賊又焚之

八月教匪盤踞朱口官軍攻之教匪數千前往救援官兵遏之不得進官軍追殺自城東周庄至城外岳庄尸橫遍野

咸豐十一年九月初六日鄆范土匪自金斗營北犯行經城東郝庄焚殺酷虐郝庄王得成等乞援於白井趙坑种樓諸村糾合二百餘人至申河口西因衆寡不敵遇害者三十餘人越十數日匪滿載歸乘夜南竄自城西北妹塚以至城東南舍利寺俱遭焚劫虜男婦無算未幾賊又北趨至城西董庄蔓延遍野

團總楊廷美率團兵禦之副團總申殿揚戰敗身死
遇害者二十餘人月餘南匪復歸以范爲巢穴本境
數受擾害各團率人攻范推張躋堂爲首領賊因南
阻黃河北受強敵進退無路誓以死拒躋堂見賊勢
浩大隱萌異志望風先逃賊追殺十數里尸骸相枕
死者千餘人武舉孫安邦廩生熊作梅等皆陣亡嗣
是各旗匪就撫復叛不可枚舉

同治二年正月降衆楊朋嶺張錫珠張玉懷等大肆
焚掠都統伊綿阿由本境大場追勦忽退兵金灘鎮

朝城續志

卷之二

匪患

四十一

玉懷等合股犯朝境大王寨王奉集所過焚殺如洗
團長孔昭著率團禦之陣亡團衆死者千餘人

二月初二日降衆程順書等復犯本境樂屯畢屯張
魯集遍地烽烟

是月初六日邑人張躋堂引黃旗張玉懷等攻破舍
利寺圩屠男女數千人初躋堂與團長邵翼之有深
仇故引教匪攻之殺戮最慘武舉邵懷之武生閆克
順文生王步衢邵丙午張文德江景祥等同遇害越
數日旗匪合股攻城知縣王培禎總團吳瑛山督民

團固守城未陷

二年八月降衆宋景詩自陝西叛歸屯聚堂邑僧忠親王破之奔本境柿子園漫延楊庄韓庄岳庄等處大軍追勦南奔觀城

六年九月捻匪張總愚自陝西奔豫省趨入本境畢屯沿途殺人焚掠破山堂圩殺廩生吳芹英王獻典等百餘人幸大兵尾追越宿奔莘縣

七年捻匪由陝東竄縣西北張義屯適當其衝圩破焚殺最慘

朝城續志

卷之二

匪患

四十二

光緒二年自春至五月不雨無賴葛二瞎米聚衆千餘在城東安住寺欲謀作亂至五月十七日天乃雨知縣姚觀峒率隊往勦至寺兵不敢進姚知縣提刀先入賊睡熟悉縛之請大府核擬定罪

光緒三十二年五月突有鄆鉅土匪紀廣賀狗眼等率匪百餘盤踞李臺架人勒贖閭邑震驚知縣袁大啟令各里長帶團丁持械齊集馬場匪聞夜遁追至壽境清水河

民國元年二月初旬匪首李四考帶匪百餘各持快

槍架人勒贖馬集李臺樂屯張寨諸集往來無常合境震駭及秋八月賊去縣境始稍安

二年十月匪首李九江等率黨七十餘名赴縣北關暗通議參兩會願就招安爲保安隊意欲穿窟城內暗出搶劫月納潤金若干援借名目冀圖自固事未就適陸軍營長曹元勛來朝九江等夤夜逸去

七年正月十六日范匪石殿華等率匪五百攻破候莊舖餘糧海兩圩殺人十九名婦女多投井架肉票二百餘人賊盤踞馬集贖戶者往來不絕當兩圩告

朝城續志

卷之二

匪患

四十四

急城中有兵三百未敢前往

二月初六日羣匪又至馬集各庄逃竄大名黑馬隊從齊海用大炮轟擊之斃匪數名被傷者甚多乘夜東竄自舍利寺至郎集傷重死者不知几次日赴樂屯擄人畜無算初八日南奔行經馬場郝庄舍利寺夕竄觀城谷疇

十四日匪由谷疇北犯午時哨馬至馬集各村驚恐爭相逃竄號泣之聲慘不堪聞日夕匪至張寨擄掠一空次晨北竄至冠縣境遇直隸黑馬隊敗回南竄

渡河河北稍安

七月十三日匪渡河陷濮州城二十三日陷陽穀城二十四日入朝境欒屯集紙房各村黎明布滿城下約三千餘豎梯登城地保蔡金城等招呼兵民登陴拒守開炮轟擊斃賊首一名賊二名被傷者不下七八十人匪知事不濟解圍去北關東關劫掠一空城東一帶諸村騾馬牛驢概行擄去

災祲

傳曰天災流行國家代有風雨蝗蝻水旱癘疫此固天數亦人事之不善致之洪範九疇天人之際捷於影響善則降之以祥不善則降之以殃理固然也漢之時魯恭蓋饒一邑令耳異政所招天猶應之蝗不入境虎負渡河反災爲祥載之史冊至今猶嘖嘖焉有民社之責者盍勗諸

道光二十七年大旱無禾人民流離餓死者十三

之三

朝城續志

卷之二

災祲

四十六

咸豐元年大風拔木日月失明

同治元年大旱秋無禾

光緒十四年大旱無禾至七月中旬霽雨爲災房

屋倒塌十之二三

光緒三十三年大旱穀禾枯死糧賦豁免

民國六年雨水爲災被淹者十之七

民國八年旱不成災

四月初二日暴風肆虐秋瘟毒盛行病十之三死

十之一

民國九年無麥春夏大旱赤地無禾五月二十七
雨僅種晚禾又多旱斃不旱之處復遭蝗蝻邑令
督捕躬不憚勞糧價騰湧米麥斗值制錢六千粗
糧亦如之貧者劫食樹葉日不能飽中戶以下皆
困急

七月霍亂疾病發生死者十之二三

暴風記

謝得所

己未四月初二日申時自西北突來暴風頃刻天
昏地暗鳥不及巢馬不識途黑漆漆如入山洞在

家者急掩其門在路者緊閉其目但聞颼颼滿耳
腥羶熏腦人人瑟縮战兢神魂失據而不知所爲
少焉紅風繼至儼若祝融下降朱雀燒空卽周郎
之赤壁一炬其烈燄漲天未能彷彿萬一較諸鷁
之退飛天之雨血其災變殆有甚焉是蓋人事多
乖上千天怒故遣風伯肆虐布散瘟毒於兩間不
惟木拔瓦飛戶飄舟覆顯施威烈而且癘疫之種
於人畜者無窮謂之爲恒風則不類謂之爲怪風
亦非過也人可不知所修慎哉

志異

石言厲踊跽鬪豕啼誕異不經之事左史書之
詳矣魑魅魍魎禹鼎鑄形非示怪也獮兒委蛇
山經圖象非好奇也誠以實有是事實有是物
使人知之不逢不若也朝土地勢平坦無山洞
湖澤之險亦無吞噬迷罔之憂僅卽其事之可
異者以筆之於書

同治八年夏城西王樓王善樂家因亂窖藏麥
十餘石及出麥下窖人輒立死又下一人又死

遂赴城稟官縣尊傅維弼立刻赴驗以雞投入
立死官大異之命拆其窖頂毫無異物令淘麥
磨食飼雞犬無傷人試食之亦無傷或者麥在
窖中久麥氣和地氣積成毒癘歟

光緒十九年城西劉庄愚民周三扈庭樹虬橫
十餘圍素有狐怪周以歲荒賣樹是夕狐附人
言忿氣百倍謂毀我窩巢壞我什器傷害我醜
類族姓百數羣苦露居至怨深讐我必重報周
詬詈之狐更猖獗時或箱籠冒火倉廩生煙積

柴被焚鄰人趨救卽移火燒之勢如寇盜無所不至村人遭回祿之災者十有數家擾及月餘合村惶懼叩禱乞哀狐耍數事一需靜處以安家室一需賠償以備什物一需服禮以謝伊類周許諾焚香矢誓村西半里許張氏殯宮也舊有大棠樹枝幹葱蘢遙望如蓋許狐卜居狐忻願去

宣統三年六月初四日日初出高丈餘忽日上有五六日少傾往南飛有二十餘日向北飛去

十餘日是年八月兵變各省宣告獨立清帝退位民國成立

城西里許有舊縣坡一名金牛坡每逢大雨水深丈餘於民國六年十一月間有聲響如雷近村共聞旦視之積冰忽開一溝長約數里濶丈餘共訝之詢之老人僉曰此金牛豁凌也古或有之

宗教

儒教

佛教

道教

黃教

回教禮拜寺在北大街道西坐西朝東

天主教教堂在南門裡道西坐西朝東

基督教教堂在西門裡道南坐南朝北